



鹿裘石室集卷第十四

宣城梅鼎祚禹金著

文

啟

上江陵張相公

帝恢至理在翼貞良天挺上材稗靈嶽瀆三台  
四輔躬赤舄以匡時北斗南箕佐紫微而布令  
故風牧克襄軒后境接華胥夔龍仰贊陶唐道  
臻沕穆於今為烈振古罕葺恭惟相公閣下上



唐李太白集卷一四  
智超凡真人翊運雲龍風虎當五百載之昌期  
漢沔荆襄滙六千里之大楚占清班于妙歲矢  
忠貞而出入三朝弼 今上于冲年受顧託而  
具瞻百辟調慶霄之玉燭陰陽風雨以惟時扶  
宥府之金樞日月星辰其咸若荒服要服有道  
而守在四隣宮中府中相須而合為一體至誠  
可貫金石爰簡在于帝心中孚必格豚魚式驩  
呼于黔首抑且温温維德饗三命而俯若循墻  
兼以休休有容引百川而渴如歸海應名世則

帝師王佐集大成而玉振金聲即詩書所稱何  
以加自生民以來未嘗有某不佞學輸半豹文  
謝雕蟲揚貝荆金偶並登于貢篚牛溲馬勃迺  
誤入於藥籠下太乙而然青藜無聞讐校直文  
昌而簪綵筆虛占清華頃因狗馬幽憂恐一旦  
永填溝壑以爾龍蛇引分念初服跼伏林樊實  
緣福過菑生敢謂進難退易只尺挹清塵之末  
三載猶新扶搖孚化之初百身非報君恩師  
義總屬高深野宿巖居遙蒙覆露雖脆同蒲質

或望秋而先零顧誠切葵心尚向陽而不改竊  
瞻象緯每交朗于泰階豈曰江湖竟忘情于魏  
闕惟以跡從分隔室與人遐斷掃門屏懸旌方  
寸茲者三釁身九頓首恭裁素楮敬貢丹忱伏  
冀台涵俯垂電徹

上蒲州張相公

至人名世玉瓚之德無私上相匡時衮衣之光  
有某周降神于崧嶽姬曆克昌漢徵命于昴辰  
炎精大熾蓋方諸陽燧惟氣是求而威鳳祥麇

逢時迺出恭惟相公閣下三晉人豪千秋國寶  
西京麗藻毫端奪參井之文章北斗儒宗門下  
總河汾之禮樂稟土風之雄厚化自陶唐儼冰  
雪之清冷神傳姑射壯年當軸奠我國家于累  
洽重熙正色立朝輔 聖天子于冲年睿德房  
善謀杜善斷同寅為之協恭蕭則規曹則隨百  
姓歌其寧一允矣功存亭毒巍乎德配神明試  
表人文之巨觀宜膺帝心之簡在某不佞文慙  
八詠學謝五車貴豈隋珠仰干照乘賈寧趙璧

唐李石詩集卷十四  
誤重連城班列清華忝竊玉堂奉詔職思讐校  
虛稱藜閣傳經每戴君相之恩若天處非其分  
欲措臣子之躬無地投所不堪頃因狗馬幽憂  
力違視草鹿麋野性意在食苹餘息偷生圖結  
敝廬于山北落毛遺粒攜歸妻子于江南敢云  
身處江湖遂忘魏闕自念材非桃李寔出公門  
顧茲宿病尚延久同孱柳是以太陽雖近徒切  
傾葵撫枕徬徨眷酬言之何日攬衣躑躅失期  
會以踰年瞻乾象于紫微喜中天其獨朗邈泰

符于清漢臨五夜而聯輝躬裁只尺之書庶幾  
代面拜送紀綱之僕敬致掃門言不足以宣心  
臯詎堪于擢髮伏蘄台鑿俯賜霽嚴

上申相公

天道高明佐神功于八柱聖謨宣朗資哲輔于  
九官平泰階之六符身登鼎鉉轉鴻鈞之一氣  
手握斗杓人文巨觀忠良上伐恭惟相公閣下  
少號聖童秉動靜方圓之性夙稱英物為文章  
禮樂之宗精金百鍊而賈重吳鈎光飛紫電立

壁千尋而境移林屋色秀青霞玉瓚黃流德器  
瑟焉溫朗泰山喬嶽風稜屹爾端凝咸推國士  
無雙共讓當今第一荷帝心之簡在惟忠孝焉  
是求首羣目以登庸知溫飽其不在四科文學  
南方擅遊偃之精華兩字力行西漢重申公之  
經術合文武而並用雖要荒守在四隣觀乎理  
之相宣使官府俱為一體中年秉鈞軸入朝而  
卻賜安車晝日接康侯侍坐而親承溫語一時  
式際上下交泰之期萬邦咸頌二三元老之德

自殷周而還于斯為盛即詩書所稱何以加焉  
某不佞襪線微長何補衮衣之闕杜樗疏散敢  
當清廟之材徼天幸于臺端遂傳衣鉢藉地靈  
于江左忝附粉榆點跡清班繆謂校書天祿濫  
竽近侍無能獻賦甘泉蓋譽偶出于不虞故災  
遽生于無妄茂陵稱疾寔同消渴之長卿禁闥  
偶違殊愧忠貞之汲黯雖飲食自安耕鑿水宿  
巖棲而涓埃莫報高深君恩師義望長安則西  
笑台垣依宸極以交輝佇滄海之東歸碣石倚

蓬萊而並峙茲者躬裁赤牘頒戒青衣遙承祐命之自天敬致起居于萬福言徒授諸副墨心實切于縣旌仰企春容俯垂電炤

又

密勿論思經遠著師貞之吉弼諧咨命承恩占晉錫之康合上下以咸孚舉華戎而效祝恭惟相公閣下格天一德貫日孤忠坐握斗杓千萬載計先社稷身隆磐石二十年倚以安危由累朝之厚澤深仁始生名世在當宁之內安外攘

特寄宗工邇緣西虜即讐敢踰河而飲馬偶會東夷解約且上隴而鳴鷗師問罪以有名正望威伸于一怒兵止戈以為武遂期化格于七旬盖始而市封盡格國體大昭况既焉經略得宜廟謨永定衣裳改任視微管而九合勲叅鞮譯在塗輔有道而四夷是守時運籌于玉帳衆口莫名其勇功天發策于金滕睿聽不搖乎浮議屢傳鳳勅藹若春溫親遣貂璫佇勤晝接如某者畫江遠守叩閣仰陳竊念大臣惟殉主為心

豈在事潔身末節聖君方恭已以聽猶宜體求  
舊虛懷願壯龍馬之精神黃圖長鞏益朗輔台  
之象緯紫氣鈞調

壽申相公

帝資詰輔闕皇聰于四門天贊元勳縣曆服于  
萬紀蓋氣求而聲應叶風雲水火之交爰喜極  
以神馳效日月岡陵之頌遙瞻泰象俯溢豫鳴  
恭惟相公閣下上智超凡真人翊運儲材累代  
出當五百載之昌期稔秀東吳生底三萬頃之

震澤領清班于妙歲矢忠貞而出入三朝弼  
今上于冲年受顧托而具瞻羣辟大臣以社稷  
為悅陳謨合宗祖之心亞聖非堯舜不稱入告  
悉仁義之道引百川渴如歸海實休休其有容  
饗三命謙若循墻睹温温之維德在國脉久培  
于熙洽故神明默相其康寧適逢虎拜之辰慶  
千秋而懷金鏡偶會龍頭之選先一日而獻霞  
觴况詒燕翼于孫謀貂蟬滿座式衍鴻庑于世  
烈麟鳳克庭灼爍醜顏麗采與宮花爭艷青蔥

鹿野石室集卷十四  
玉樹高名將燕桂齊芳誠哉保佑自天詩傳嘉  
樂允矣驩呼率土易考履祥某不佞墨守雖勤  
冰兢徒切昔塵瑣闥曾竊依衮繡之光今忝藩  
屏媿謬膺兵甲之寄望北辰而星拱佇朗台垣  
祝南極以年增弘開壽域敬挹瑤峰之水願代  
添籌恭承玉鉉之占永言凝鼎

上許相公

風雲交會黃扉依天闕之九重箕昴儲精紫極  
御星垣之三象蓋師傅道之教訓時謂著龜而

老成重于典刑迺咨耆舊恭惟相公閣下貞良  
在翼智略超凡大器不官秉動靜方圓之性斯  
文有主為詩書禮樂之宗代宣天語而隻字光  
擬絲綸再掌賢關而多士化行棧樸共仰甘盤  
之舊學光翊三朝爰占莘尹之阿衡咸有一德  
以社稷為說矢謀合宗祖之心非堯舜不陳入  
告先仁義之道合華夷想望其風采惟民具瞻  
將神明默相其壽康與君同體者也某不佞水  
競雖切墨守徒勤試采菲封遂併忘乎下體必

恭桑梓分効役于前修偶奉詔而出疆引淮流  
其若帶繆分司于積貯指儲粟以如山彼適當  
三載之期涉明寧望故何意一籌莫展攷殿猶  
逃香折芝泥忝沐鸞封鉅典光回棘壤聊申烏  
養私衷繇終念卯翼之初恩同天地只尺接威  
儀之末光映日星願叶箕陳聚九疇而為福維  
時陽長隨六琯而生春仰恃台慈俯垂電徹

奉許相公

至人名世玉瓚之德無私上相匡時袞衣之光

有某周降神于崧嶽姬曆克昌漢徵命于昂辰  
炎精永熾蓋方諸陽燧惟氣是求而威鳳祥麇  
當期廼出恭惟相公閣下神明合德沕穆凝思  
北斗儒宗起千秋而兼存禮樂南方文學冠多  
士以獨得精華奠我國家于累洽重熙具瞻百  
辟輔 聖天子于冲年睿德出入三朝運太曆  
之金樞日月星辰其咸若調慶霄之玉燭陰陽  
風雨以惟時抑且大度休休引細流渴如歸海  
况以小心翼翼饗嘉命俯若循墻是誠盛治天

開應昌期于五百真符地啟粹靈秀於東南者也  
某不佞學慙半豹文謝雕龍揚貝荆金偶附  
登乎貢篚牛溲馬渤廼悞收諸藥籠適奉一節  
于上游勢當扼吭每轉千艘于外府利耻析毫  
矢保清貞願竭量沙之末智惟明出內遙承借  
箸之遺謨竊念義切粉榆繆稱隣社自分材非  
桃李幸出公門雖涓埃莫報高深而蹤跡久成  
疏逖茲者拜送紀綱之僕心實杼丹躬裁只尺  
之書言徒副墨

又

勲隆安攘廟謨實寄中權義篤忠貞聖眷益勤  
哲輔仰泰交之永固翊鼎命以恒新恭惟相公  
閣下上智超凡真才間出身關國脉在天下久  
倚安危坐握天樞宜日中與時消息或來王而  
來享方欣象馬咸歸廼不虞于不庭偶值犬羊  
匪茹粵軒皇克襄風牧詎能緩涿鹿之師在周  
宣協贊甫申亦嘗勤太原之伐惟祕謀有資于  
神筭知甲兵已在胸中故決勝特出于運籌彼

唐李石詩集卷十四  
一  
要害遙圖掌上迨功成而辭賞共服勞謙儻道  
大而莫容何來浮議睿聰日照寢滿篋于中山  
天語春溫降重綸于西第玉累磨而愈瑩適增  
玉鉉之光華金百煉而始精益保金甌之密覆  
念大臣事專報主豈取便于潔身况 聖君禮  
重師臣本厥孚于咸德宜務安安之大節式承  
几几於流言某塵職僊鄉未敢問堂開綠野懸  
心魏闕願長瞻位正黃扉佇膺萬福之攸同畢  
公弼亮行見四方之寧謐方叔壯猷

壽許相公

黃扉依天闕九重太符交朗紫海隔人寰萬里  
壽域弘開蓋姬曆克昌周降神于崧岳炎精方  
熾漢徵瑞于昴躔遠邇騰歡玄明叶贊恭惟相  
公閣下名標紘外道契環中北斗儒宗虎觀常  
叅筆削南方士首鑿坡專掌絲綸當百辟之具  
瞻周旋左右為三朝之元宰丞弼後先宥府握  
金樞日月星辰咸若慶霄調玉燭陰陽風雨惟  
時朱顏與鶴髮相承蟠桃久熟赤鳥仰龍鱗共

采若木初華是國將縣此有道之鴻厓故天必  
昨以無疆之燕佚者也某駕駘下乘分効役于  
執鞭樸遨散材誤收羣子使器敬上岡陵之頌  
喜黃山白嶽堪盟薄將筐筐之儀借翠竹蒼松  
為祝命九疇而凝福願合箕陳聚百順以事君  
永尊宸極

上山西王相公

詰輔匡時翊天工于八柱睿謨經遠贊神武于  
四方觀盛際之泰交合輿情而豫順恭惟相公

閣下河汾禮樂始射精神校部丙丁星壁實圖  
書之府題才甲乙天曹曾水鏡是司平太階之  
六苻蚤登鼎鉉轉鴻鈞之一氣潛握斗杓象馬  
咸歸方來玉而來享犬羊匪茹廼不虞乎不庭  
何煩六月師行祕謀有資于廟筭遂致七旬化  
格決勝特出于運籌蓋將相調則士知豫附故  
安危繫在朝廷必文武備始用當機宜即折衝  
不違樽俎越昔金城定策亦由主畫之弱翁于  
今玉塞清塵共仰壯猷之方叔某不佞阻江分

歷代石室集 卷十四 一  
服愧借箸之無能戀闕馳情念掃門之漸遠顧  
大造均調萬品草木知歸而高天曲覆孤生涓  
埃莫報維時陽長依六琯以生春願叶箕陳聚  
九疇而為福

上太倉王相公

經綸密勿實稱百辟之具瞻左右周旋宜屬累  
朝之舊德蓋鳳翔千仞下必攬于德輝鶴鳴九  
臯聲自聞于霄漢逢時乃見惟運所關恭惟相  
公閣下道契環中神標絃外南宮士首鸞坡專

掌于絲綸北斗儒宗虎觀常操于筆削方睹三  
鱣之遽集共兆同升暫從六鷁而退蜚將圖導  
養人情攸屬徵車賢夢卜之求國是方清抗疏  
息和同之議道合歡于魚水一時式際泰交德  
施美于雉膏四海咸蒙鼎餼允矣名堪副實在  
天下倚以安危卓哉出則有為使 朝廷正其  
綱紀某不佞學慚邈辨智乏雞占樸遯小材誤  
徵名于使器粉榆未植分効役于執鞭比適當  
三載之期陟明寧望故何意一籌莫展攷殿猶

逃香折芝泥忝沐龍文之鉅典光回棘壤聊申  
烏養之私衷雖涓埃莫報高深非草木寧忘雨  
露六符瞻象緯喜交朗于泰階一氣轉鴻鈞願  
交繇乎乾曆

又

師臣弼亮啟皇聰于四門神武光昭贊廟謨于  
九域隆晝明之晉錫慶上下之泰交恭惟相公  
閣下至德匡時真才命世南方文學早擅多士  
精華北斗儒宗允作斯民先覺始號卧龍于隴

上耻管樂與比肩既起司馬于洛中合華夷而  
動色安危但視其出處登鼎鉉實簡宸衷陰陽  
悉屬其卷舒握斗杓以酌元氣念老成紆猷經  
國無如張弛之並行迺猾虜背德解盟輒敢東  
西而合舉惟祕謀有資于睿算何煩六月之師  
論決勝特本于運籌遂致七旬之格抑且謙虛  
不伐天下莫能名勇功兼之豐大勿憂日中善  
與時消息頌天申于保佑宜帝眷之寵嘉某不  
佞分職江隅媿無因而借箸懸情魏闕阻効役

于執鞭累膺覆燾之鴻私涓埃難報遥遡斗台  
之象緯霄漢長明願言萬福來同行覩八紘寧  
謚

壽翁尚書

龍蟠虎踞清曹依天闕之九重岡峙川增壽域  
啟文昌之八座紫氣遥騰于東海驩聲近集于  
南宮五百良期三千勝會恭惟太宗伯翁公箕  
占賚說嶽降生申禹穴珍函夙紬精於綠字會  
虬竹箭蚤克陳於丹宸爽鳩民自以不寃仰

翰肺石祝螺士羣乎善肖秘闈心模游刃有餘  
允矣身兼數器承蜩若掇居狀連叶旋規先知  
覺後知學海擅雕龍之譽小德役大德泰階首  
振鷺之班出水族以咸寘春臺玄圭告錫捧冰  
衷而獨垂日鑑朱紱方來每虛喉舌之司惜老  
成人維求舊特重夔夷之選睠寅清政聿更新  
歷試諸艱旣迴翔於中外疇咨宗伯寔綱紀序  
賓嘉庶四思之愿少誵迺三事之登在望斗樞  
回北文鶴奉曳履之芳聲雲笈傳西青鳥肇懸

弛之佳候式如金式如玉緬言君子孔昭俾而  
熾俾而臧受茲王母介福中年秉軸豈竢渭川  
之黃髮始載後車正色立朝孰與宣室之玄  
言偶移前席不必問三巡甲子靈丹駐瓠水于  
方瞳奚勞守五夜庚申僊露賜金莖于高掌蓋  
昊天欲縣有道必久延袞職之贊襄故老臣惟  
卹無疆自永饗琳庭之燕佚某班荆雖宴分効  
役于靴鞭推轂何勤誤聳音于收爨只尺挹清  
塵之末晉寵朋龜繇終念郊翼之初豫陳賀雀

蓬壺引手借祝史以代詠陶薇省論思察人情  
其賢寤卜畢公弼亮 聖天子萬八千年郭令  
純厯明中書二十四考

賀大家宰宋公

尚書本天喉舌列八座之尊嚴冢宰猶帝股肱  
統九流之銓筦蓋人維貴于求舊况事莫急於  
題才慶盛世之遭逢浹輿情而鼓舞恭惟相公  
閣下真良在翼智略超凡天匠夙成秉動靜方  
圓之則地靈攸稗會陰陽風雨之交歷中臺攬

轡澄清獨持風采引後進垂紳正色具爾巖瞻  
善格君心即三司不進條錢穀慮關國脉雖元  
勛亦自領度支閭閻有若更生大議春和之賑  
貸宮府合為一體盡裁歲節之供儲謂理財要  
在用人而持衡重于握筭爰稱政本迺簡宗工  
辨晰妍媸甄羣倫于水鏡望占象緯酌元氣於  
斗杓是必國人皆曰賢夫然後察既得天下之  
大老彼將焉歸某不佞名謝荀龍學慙袁豹念  
昔趨承禁閨繆獻直于青蒲越茲屏翰東南敢

揚威於白鉞況如水旱薦饑而哀鴻遵渚實藉  
寬仁兼且萑苻交警而逸虎負隅遙資雄武非  
草木寧忘雨露顧涓埃曷補高深鼎鉉式臨佇  
見鈞調萬品泰階首陟永言翊贊三朝

上山東楊冢宰

宣昭王業事莫急於題材熙亮天工位豈虛于  
求舊蓋得天下之大老彼將焉歸以至國人皆  
曰賢夫然後用信孤忠之上代迺百辟之具瞻  
恭惟閣下道叶希夷學傳精一泰山滄海遊于

門若見高深魯壁孔林升其堂如聞絲竹通古  
今而知要蚤奮跡于風猷適小大以維宜晚更  
敷于內外偶學卧龍于隴上任卷舒之無心終  
起司馬于洛中合華夷而動色尚書本天之喉  
舌爰秉政衡冢宰猶帝之股肱遂咨耆德賢愚  
式序舉九品以咸修網紀甚明引千鈞其不爽  
逝家聲于清白庭絕暮金甄物類于妍媸朝稱  
水鏡是且握斗杓而酌元氣行將登鼎鉉以簡  
予衷某不佞學慙握算智竭量沙襪線微材悞  
徵名于使器衣冠後進分効役于掃門雖萬卉  
不謝榮春風而一物實蒙恩造化逝泰苻于清  
漢臨五夜而聯輝瞻乾象于紫微喜中天其獨  
朗仰干台鑒俯賜霽涵

上沈太宗伯

尚書本天喉舌儼八座之尊稱宗伯猶帝股肱  
具百僚之師表爰咨寅直式簡清貞蓋為國非  
禮不行而羣策須賢廼集恭惟閣下箕占賚說  
嶽降生申精識造微實蒸民之先覺紆謨經遠

本命世之鴻才領妙選于木天文昌春映專對  
讐于藜閣太乙霄然翠幄橫經共仰甘盤舊學  
寶儲陳禮獨傳大戴遺文優遊養望于三朝假  
南宮之餘日啟沃徃宣乎一德開東閣以承風  
抑豈必夢卜是求帝師王佐行且見賡歌載起  
拜手颺言慶盛世之遭逢浹輿情而鼓舞某不  
佞學慙握算智竭量沙偶奉一節上游本重形  
乎扼吭每轉千艘外府耻言利于析毫香折芝  
泥忝沐鸞封鉅典榮增棘壤聊申烏養私衷雖  
涓埃莫報高深非草木寧忘雨露只尺接威儀  
之末光挹日星繇終念卯翼之初恩同天地維  
時陽長依六琯而生春願叶箕陳聚九疇而為  
福

又

帝資詰輔達皇聰于四門天著玄儀佐神功于  
八柱故風牧克襄軒后境接華胥夔龍叶贊陶  
唐道臻沕穆金甌密覆玉燭均調恭惟閣下智  
略超凡貞良在翼陰陽風雨地靈交會中州動

靜方圓國器夙成上品植本崑山片玉瞻紫氣  
以輝含根移崧嶽三花撐青霞而色秀星壁實  
圖書之府校部丙丁天曹迺水鏡是司題材甲  
乙念典禮典樂宗伯為任匪輕而惟寅惟清老  
成之求宜舊肅肅曳尚書之履久識清聲嵬嵬  
莪進賢之冠宜膺上賞知帝心其簡在信人倫  
之巨觀蓋已見手握斗杓轉鴻鈞之一氣行將  
身登鼎鉉平泰階之六符者也某不佞材慚八  
詠學乏五章貴豈隋珠光誤收于照乘寶寧趙  
璧價借重于連城茲者仰叩丹屏躬函赤牘雖  
弱質自同孱柳而近陽每切傾葵陳言不足以  
宣心論過詎堪于擢髮喜中天之獨朗依乾象  
于紫微臨五夜而聯輝遡台垣于青漢

某司馬啟

臺下嶽降生申箕占賚說方城漢水共知楚國  
其尊白雪陽春獨擅郢人之巧秉文衡于三輔  
牛口掄賢張師旅于西川旄頭失耀儼然朝宁  
為龍副矯矯之稱簡在帝心司馬著桓桓之

節念留都祖宗重地况內臺法紀清曹遂用僉  
謀益推舊德鷺車多繡羣司咸肅霜威虎踞龍  
蟠千載猶存王氣允矣被錫蕃于晉晝行將協  
符瑞于泰階者也某不佞自慙樸樾小材誤蚤  
收于琴爨豈謂參苓良劑遽備載于藥籠繇終  
循卯翼之初恩同天地只尺挹威儀之未望切  
日星雀躍陳驩聊托未將于筐篚螺鳴善肖敢  
貽不類于門墻

荅邵中丞

絳節朱軒文武萬邦為憲洞庭雲夢山川上國  
爭雄拜命增榮捫躬知重恭惟臺下東瀛挺秀  
西尾降精崇禮起家紹曲臺于玉帶紬書侍闕  
承雙掌于金莖羨驄步之能工行行且止瞻烏  
飛以爰集肅肅其儀因念荆湘本先朝湯沐之  
地遂勞耆碩寄中丞撫填之司坐銷全楚妖氛  
無煩京觀遙訖三湘聲教不忝雄風况如通糴  
濟隣數千里悉霑河潤近復若暘時雨十五郡  
咸屬春生蓋已頌分陝之召公甘棠詠就行且

相弼殷之傳說鹽梅道交者也某不佞井絡微  
光蠶叢末值跡殊賭郡分虎竹于宣城事視高  
齋媿鴻裁于謝朓生平切北斗之望尚緩班荆  
解逅想東山之高遽蒙投玉縹緲在握儼琚珮  
之親承筐篚孔將感琅玕之難報臨風而隄尺  
素書不盡言依日而剖寸丹儀非及物仰企巖  
瞻伏幾海育

中秋請按臺

蟾輝魄滿秋芳桂苑之期驄步行工風肅蘭臺

之候敬當拂席爽待披襟恭惟台臺正色立朝  
讜言經國迺勤左顧諸郡皆三輔隩區式重親  
巡池陽猶九華勝地甘雨與嚴霜並布民頌二  
天澄江共峰黛俱清節逢八月藩屏繆寄忝稱  
東道主人理詠餘閒敢廁南樓賓佐仰體歲荒  
減膳知切念于痲瘵聊從夜晏焚枯借溫顏于  
頃刻冀龍光其下賁若獲簡珠喜雀躍以先迎  
慚無加璧

鹿裘石室集卷第十四終

鹿裘石室集卷第十五

宣城梅鼎祚禹金著

文

啟

元宵宴楊給諫

上元令節本賜福于天官端月良時敬要驩于  
星使浹輿情而稱慶肆廣會其具陳數千家鼓  
腹含哺知有脚陽春盡徧三五夕賞心樂事看  
打頭明月初圓開不夜之五城火樹與銀花爭

鹿裘石室集卷之五  
合遙拱辰于雙闕鰲山扈鳳輦曾遊預占一歲  
之豐登鈞調玉燭敢接清宵之燕笑醉寫金尊  
卜晝非期就雲伊邇

餞楊給諫

月窟星橋方傳柑而慶節紅亭綠酒忽折柳而  
祖行睹四牡之還朝奉雙函以獻闕帝德蓋高  
天覆地浩蕩難名使行則甘雨隨時流離載集  
職非教稼視民饑實由己饑國本重農置官事  
盡如家事知仁人不可失臥轍攀留念賢者其

獨勞分襟戀別慚無幣帛羨行李之益清聊具  
壺簞詠來蘇于旣去佇見風生青瑣焚草摠忠  
尚期日侍黃扉調梅特命願何處我望若登仙  
請楊給諫

鳳瑄回春望條風而披拂鷺車凌雪依愛日其  
融和共稱一路之福星咸沐九霄之甘雨恭惟  
臺下台垣佇朗井絡儲精天眷親承每拾遺而  
補闕君言不宿因布惠而施仁東南之水暎荐  
饑仰塵宸慮吳越之蒸黎待飽遠咏皇華雖昔

賑貸若漢文猶未斥金錢于少府在今方嚴如  
汲黯遂盡頌玉粒于淮揚敢乘石畫之豫間敬  
布雲占之需宴自媿溪毛澗藻猶可羞于王公  
何能置璧加籩用特申乎賓禮冀龍光其下賁  
喜雀躍以先迎擁篲臨風虛襟待命

又

青瑣森嚴風論望隆于諫草朱軒棊奕星言命  
重于皇華成就日而更生真代天而理物恭惟  
台臺仁心為質直節經通朝宁龍光人羣鳳舉

偶緣南顧勤九重宵旰之憂暫詔東巡寄百萬  
生靈之命蓋興發始徵于秋省豈事游觀賑貸  
合議于春和仰勞諮度舍哺鼓腹如出諸水火  
之中擊壤行歌若置在衽席之上俯察輿情共  
戴圖報未由敢陳嘉宴合歡奉將恐後必恭棗  
梓庶稱詩而竊謂主臣不腆肴烝媿踰禮而質  
于尊者翹首以瞻四牡獲濟謙光曲跽而引三  
騶曷勝豫忭競競待過縷縷飯誠

賀鄒學使

道契環中神標絃外泰山喬嶽風稜屹爾端凝  
秋實春華藻思蔚焉膏沃稟動靜方圓之性大  
器不官為詩書禮樂之宗斯文有主乃咨舊德  
將升北斗之六符暫試上游遂領東方之千騎  
鴻渚流離載集陽舒起仆而噓枯鯨波清晏不  
揚日出奉珍而作貢方切衮衣之重望永樂推  
蘇遽移斧鉞之清光式歌棧櫟城連十五剖遺  
璞于荆山壇列三千探藏書于孔壁賦雄風而  
披拂雲澤蘭臺沛化雨之沾濡方城漢水某智  
乏雞占辨慚鼠斷金在鎔而自躍謬屬五齊馬  
服櫪而長鳴仰圖一顧惜二天之漸遠猶藉幘  
幪睹四牡之孔嘉曷勝懸戀

與焦弱侯太史

天心簡在生膺名世之期地運光昭出為士鄉  
之重望公門雖尚遠桃李敷榮本接壤而為鄰  
粉榆借蔭恭惟閣下學標絃外道貫環中統壹  
聖真親踐尼山泗水游先象帝兼叅柱下漆園  
縱橫禮樂三千丹墀獨對冠冕英雄五百紫殿

臚傳天祿宵嚴藜火光分于太乙蓬萊春迴牙  
籤鱗次于丙丁暫爾備 顧問講讀之司常勤  
晝接行將受舟楫鹽梅之寄用代天工蓋留都  
粹六代之精靈若鉅卿繇 累朝之生養某等  
技慙墨守識淺管窺生也晚猶幸同時居相近  
仍欣快覩竊念敝邑神明之宰久播太古弦歌  
之聲耻若內溝使匹夫匹婦與被其澤智能行  
水即注江注海各獲所歸匪徒漕輓安流直達  
萬方之貢抑且污邪咸乂克奏庶食之囍昔鴻

隙之歌汝南虛懷黃鵠粵離堆之闢蜀漢謬說  
青牛儻圖後事不忘共冀雄文可永惟一字大  
增榮華袞而麗牲實待命貞珉綵筆生花夢吐  
鸞文之五色蘭臺起草更傳麟史于千秋仰恃  
恩慈俯循輿頌

奉大廷尉蹇公

明公貞良在翼特達經通西序笙鏞本禮樂文  
章之宗主北門鎖鑰信甲兵武備之全材漁陽  
之鞞鼓不聞款關內質甘泉之烽火久息外攘

內寧虜已墮目中惟借箸前籌而先聲奪氣人  
皆置度內即投醪挾纊而實德惠心邇緣欽卹  
之恩無庸重典迺借阿衡之任暫式明刑民自  
不寃對簿定虛于聽石後當益大驅車蚤見于  
高門庭中鶴髮雙垂共瞻舊德天上鸞書並賜  
式沐新銜如日之升與月恒而穆穆望雲遙祝  
想霞舉其軒軒是天必胙此老成享無疆之燕  
佚俾國將賴彼元輔繇有道之鴻庥者也不佞  
鼎問禮通家稱詩侍坐近親興敬敢抒筆札之

微長猶子均情聊附斑斕之戲綵伏願木公金  
母蟠桃會宴千秋行占桂子蘭孫奕葉敷榮百  
代

奉蹇督府

推轂專征運籌制勝念薊遼為國家要鎮須彈  
壓以重臣况東西之老上合營方憑陵於狡虜  
先聲謀伐可一戰而坐屈人兵左顧鑿深雖有  
言而益勤 帝眷蓋樂羊中山之篋堅三寢而  
功成若充國金城之屯破羣囂而議定清秋乘

障烽煙息警急之傳明月臨關士馬見嬉騰之  
樂佇擬景風布令新恩興詠于彤弓行占胡氣  
消氛神武申威于白鉞允矣萬邦所共憲卓哉  
一代之元勳鼎小子筆札就荒媿負騷壇夙好  
蒯綏在客遙違幸舍初驩惟仰傳玉帳師貞敢  
勒銘于燕石尚伏願瑤階泰協即升命于台衡  
切望龍光曷勝鶴跂

奉南太宰曾公

履端肇慶晉錫薦隆內廷之新 命初臨三陽

嘉會累朝之舊德咸有百辟皈依粵昔六典分  
曹摠治莫尊于太宰當今兩都並建敘揆先試  
于留銓蓋夙承眷于 帝心蚤著簡要清通之  
譽益藉恢張乎羣目畢收方圓曲直之材合中  
外盡祝 俞音知人情已賢夢卜更翹跂漸升  
爰拜端 國棟特屬鈞陶是誠平陽趣治裝之  
期共彈冠而燕賀衆行即闕急追鋒之召正虛  
席以待公者也小子鼎墨守徒淹丹斫非麗學  
書記姓良慙繡虎之浮名問禮通家頓遂登龍

之上願頗受知于筆札敢云記室翩翩每侍側  
于譙譚庶備及門侃侃南望青幡之拂漢建業  
生春北瞻紅旆以朝天長安近日肅勤一介仰  
叩重階遙申八座之起居佇挹六符之魁象

奉南少宰九我李公

三台四輔躬赤紱以匡時 北闕南都象紫微  
而並峙周錄肇基于豐鎬漢官實切于銓衡恭  
惟座下閩海文瀾武夷仙植貞良在翼為詩書  
禮樂之宗智略超凡秉動靜方圓之則爰荷

帝心之簡在首掄羣目以登庸領妙選于木天  
文昌春映專對讐于藜閣太乙宵然 御幄橫

經望重甘盤舊學橋門觀禮化行多士賢關遙

占虎踞龍蟠勢嚴根本暫輟 鸞坡鳳掖詔佐

題才行將登鼎鉉以饗大烹是且握斗杓而酌

元氣者也某不佞品慙樸澁蚤誤收于藥籠力

竭駕駘每勞勤于鞭策何能發聖師之莞爾有

負絃歌幸道議吏之焚然仍司虞澤恩同天地

絲終念卯翼之初光挹日星只尺接威儀之未

維時清和入御願祝萬福之攸同佇見景佑自  
申即膺九重之新眷

答陳學臺

龍蟠虎踞勢嚴天府于西都鳳采鸞章望重星  
垣于北斗蓬山共戴瀛海知皈恭惟台臺直氣  
凌雲清光近日讜言經世彤墀露伏青蒲正色  
立朝紫閣風生白簡爰謂菁莪棧樸本壽考以  
作人因重畿輔鎬豐為斯文之宗主方春時雨  
凡桃李悉在公門良冶大鈞即瓦礫皆成國器

進賢宜膺乎上賞玉陛先登徵名擬列于中台  
金甌密覆某不佞材非製錦操刀實恐有傷禮  
在式閭掃門媿無為役幸獲寬于弛擔敢曰鶯  
遷良籍策于長鳴頓增駑價况昔河潤九里枌  
榆之被澤猶深于今駕蒞三吳瓊樹之瞻依愈  
切圖報仰期需命何言俯濟謙光情彩兼抒賜  
以溫言之勅玄黃相燦貺茲成享之儀遙稽首  
而拜嘉竊汗顏以夔立佇見帝心特簡臺端晉  
獨坐之尊將冀天路分馳曹下布羣趨之武幟

鹿裘石室集卷之五  
九  
蒙有自佩服無涯

賀陳學臺遷太僕

學統聖真道先象帝聚星潁水遙遙胄衍神符  
凌漢豫章奕奕材膺國器封皂囊而簪白筆殿  
中肅柏府之清霜仰北斗而宗泰山江左霈杏  
壇之時雨大成大小成小十四郡悉屬鴻鈞步  
亦步趨亦趨三千士咸能速肖况夫久道成化  
凡及門豈止坐一月春風兼之敷教在寬即庶  
司何幸接六年光霽既進賢宜蒙上賞罔命爰

申由正僕待駕東朝鼎揆漸陟河海應象飭輿  
馬出入恒隨雲錦成羣詠駭牝塞淵自秉尚期  
引斯作無邪之旨啟沃王心益願奮善御不窮  
之詞軫存民力蓋伯玉變邪歸正夙為海內之  
文宗幼公經明行脩竟執臺端之綱紀官曾司  
馭烈並承先卑職某某薄言代斲深惟血指是  
虞偶爾治庖實懷越俎之媿雖未親聆咳唾猶  
然望見宮墻快覩鶯遷佇台垣其交映驪揚雀  
躍擬郎宿之依光

慰黃學臺啟

上苑天章中州人杰聖真統壹學術承伊雒淵  
源文藻斌璘制作紹商周典誥首擢芳于桂闕  
士望來儀既鈔選于蓬山仙班初筮惟朝議  
重歸臺諫故公評暫借翰臣持斧西巡太華與  
黃河競爽主衡南輔春風共時雨交敷凡茲濟  
濟之青衿方及門而稱慶詎謂依依之白髮詠  
陟岵以靡由雖慈母存順歿寧榮哀備至而孝  
子有求弗得思慕曷窮某不佞一郡竊叨虛名

長牧二天仰芘實荷帡幪每燕喜之是期雲瞻  
府栢迺烏悽之忽報霜冷庭萱遙束生芻儀甚  
慙于及物敬激招些詞不足以宣心伏冀達變  
節哀企待新恩介祉

奉方侍御

峻節風生周行霜凜南方之學蚤獨擅其菁華  
東岱之靈遂特鍾于名碩奉天威而攬轡肅  
然見諸路澄清引王度以從繩鬼乎樹一時  
綱紀立朝以正直忠厚為本豈徒逞搏擊之

虛聲省方惟吏治民生是圖實無忝親巡之  
寵命豫遊既久鼎望益隆繡斧重臨暫借咨諏  
于閩海玉衡待握佇期熙亮于虞廷蓋巖端已  
宿具瞻在天下咸聞風采某不佞學疏操縵繆  
受賞音才謝冶金敢勞陶鑄往歷十年于鳩署  
丹墨徒煩近分千里之虎符甘棠未詠况帝畿  
為股肱重郡而師門猶車輔鄰邦念頂踵悉沐  
生成且幸宮墻密邇即毫髮靡從報稱仰勤函  
篚賜頒緬言歲慶履端共迓休于椒頌式睹陽

亨泰運敬申祝于栢臺聯汝騎以錦還騰輝梓  
里承漢綸而璧召趨覲楓宸翹首龍光揚眉燕  
喜

賀新都梁太府

崑圃懸瓊燕山芳桂立朝甫冠蚤占通達國  
體之材分署牽絲遂典出入京儲之任蓋周官  
列司徒之屬職在養民而漢室論鄼侯之封功  
推轉饗偶塵南顧黃山與白岳齊高特領東方  
畫戟引朱輪從邁爰茲股肱之重郡因借偉人

鹿巖石室集卷之十一  
幸依唇齒而為鄰謬稱同家竊親臨如巨斗實  
遠拜于下風陽春布千里之清陰甘棠載路德  
雨播一方之盛化桃李盈門惟其不吐不如酌  
剛柔而出政故且之綱之紀兼文武而憲邦凡  
請攝者及年荷帡幪以非淺願即真于指日念  
匡翼之滋深奏績當期遷喬佇 命題屏已標  
姓字鼎象夙隆 賜金暫獎勛庸泰階漸陟敬  
陳雀忭蕪詞良謝七襄仰覲龍光佳氣先徵五  
采喜巖瞻之密邇冀海納其春容

請蕭郡公

維時金飈薦爽玉露澄清黃菊紫萸正南國登  
高之候姬禾郵稻適西城省歛之期況茲教化  
鴻宣望畫熊其承式若爾旄倪咸集戒竹馬以  
先迎佇挹龍光曷勝雀躍

請金太公

時蘇歲豐穡事報秋登之后政成化洽萌生游  
春育之中回天心禱雨祈晴神為默相勤吏治  
虔朝惕夕民以告康凡屬精者兩年行陟明于

羣辟百日勞而一日澤道叶弛張千人頌而萬人謳情占遐邇爰合歡聲于通郡敬供清饌于荒廬仰體菜羹必飽之高風謙光下濟聊附草蔬同飯之末節履素自持肅莫熊軾之况臨躬潔兕觥而稱壽嘉期待命齋宿式承

請某公

敬邁良時喜膺寵命葵心嚮日候當四月之清酥芝檢從天恩錫五雲之徵召蓋九德莫先邁種師師將薦任股肱在百司首重諫臣侃侃

必藉推耳目三臺六省高標極北之直聲四世三公榮詔關西之華胄惟茲散吏特荷鴻鈞數年汲引同升夙幸依飯于畢齒一旦雲泥異跡頓違矩矱于承顏敢援需宴祖敞佇望謙光下濟願言効駕躬潔洗觥

請尹令公

維月既望初陽肇開律應黃鐘正一氣調鈞之候詔頒紫闕當萬方執玉之期佇僊履之雙鳧高翔雲表瞻使車之四牡夙駕星言洞酌陳

詞弁雀喜揚祖道通家問禮猶龍光賁衡廬敬  
薄戒夫草蔬願承和于葭琯端襟載拜拂席以  
需

先大夫從祀文成祠請尹令公

崇德報功為政之當先務尊師重道斯文自賴  
主持惟姚江新建之興明繼往開來之學良知  
兩字直溯一貫之淵源高弟數人轉授千秋之  
衣鉢列祀昔肇修前哲茲嘗稱鄒魯之鄉振新  
今有待真儒况復出稽陰之里使先人仍預于

俎豆幽魄生光在後進如見于美墻教思弗替  
敬延騶御薄潔兕觥共歌魚藻之遺詩樂觀駮  
奔之盛典均懸斗仰佇望台臨

嫂劉氏建旌節坊請郡公

表揚風化實善政所必先佇咏露斯叨湛仁之  
廣被故懷清式標于往代迺褒貞彌重于鈞臺  
近日瞻天畿輔榮分畫隼慈雲惠雨窮荒咸誦  
猶龍偶一節之在閭閻遂勤 恩賁荷三命之  
施蓬革藉重光臨井絡承暉台垣顯陟

請鮑令公

長日占圭當一陽迎祥之候 朝天捧玉適萬  
國輯瑞之期載最績以升聞定泰階之峻陟具  
瞻雖切攀附曷由荷帡幪者五年實深戀戀申  
懃婉于一夕願藉陶陶蔬食菜羹諒王公俯從  
共飽執庖正席在貧士望若調飢佇請台期竊  
勤斗仰

壽時甫叔

壽躋指使宦達投閒齒德俱尊身名並泰早完  
婚嫁紫煙要五岳之期久著篇章白雪俯三巴  
之調况復當庭戲綵扇棣萼于陽春兼夫舉案  
齊眉鼓瑟琴于良月恭逢盛事偶屬薄遊遙祝  
千齡寄吟七字南歸在邇尚能及璿圃之花西  
宴未闌猶可醉瑤池之酒情深鶴企喜溢雀揚

麻宅聘啟

伏以天人交贊適逢緹瑄陽蘇星物聯輝共睹  
金屏喜氣葦蘿得托蓬藿增榮恭惟十洲親家  
閣下道契環中象標紘外昂昂玉立若野鶴之

出羣雞穆穆瑤音似黃鐘之宣大呂策文石蚤  
魁多士 帝已識其樸忠握水鏡式別九流時  
悉皈其銓筦即進止不失尺寸隱然負公輔重  
臣或造次亦有準繩卓哉誠德禮君子近承  
恩而請沐過里下萬石之車每却埽而端居望  
衡息四知之餽問以何樹則不對溫室尊嚴儻  
餘啟草必盡焚天曹祕密固不徒具瞻 朝宁  
抑亦見備行庭問敬婦如賓雖被繡而荆布之  
風仍在事嫂猶母本同株而棟華之慕常殷况

復仲氏歛筦和工吟于夢草兼以諸賢接袂欣  
把臂而入林蓋列祖積功累仁宜饗無涯之報  
而贈君長筴短造益鴻未究之施既咸號積善  
之家直追元凱久已稱清華之胃豈讓崔盧不  
佞鼎學海測蠡墨林窺豹二三其德恧先訓之  
往垂四十無聞笑童心之未化許文休不容族  
黨世滿虛名梅子真寄跡市門生存仙骨草衣  
木食衆謂可以抗王公鈴說卮言吾自知其為  
曲士計清塵之與濁水敢妄扳援乃雲鷄猶念

泥潛許申婚媾潘楊奕世姑子姪莫匪懿親孔  
李通家舊昆弟親加密好諒夙體先人之意定  
遠開後裔之祥傳淑愛女誠克諧佇膺冠翟媿  
小兒聖謨初誦尚謬魯魚匹鷺敬脩循士庶之  
儀宜薄雙鸞鳴應在唱隨之義踰敦宜爾室宜  
爾家百代長縣麟趾俾而臧俾而熾千齡永叶  
鳳占斗仰曷勝台涵是冀

韓宅聘啟

黃鐘應令調玉琯于初陽繡幕要歡卜紅絲于

宿好事占咸吉喜溢豫鳴恭惟寧翁老親家上  
苑良材高陽華胄庭施棨戟架富縹緗第五之  
名本齊光于驃騎無雙之略實資斷于韜鈴河  
東三鳳翩翩暉翔千仞頰上八龍嶽嶽星聚一  
方肆我灑石尊親家紱麟蚤兆變豹已章舉體  
無凡左中規而右中矩即聲為律小應商而大  
應宮海風譯韓愈之雄文仰如北斗廷對遡魏  
公之相業奏見卿雲綽有父風舉策益勤于數  
馬乃繩祖武竊銜深戒于稱駒東山碁局時開

游從俊叔西第歌鐘日起坐滿嘉賓不佞鼎胙  
原子裔忝貳命于汝南貽厥孫謀衍洪波于江  
左許文休久淹在蜀徒負虛名梅子真托隱于  
吳幸存仙骨竊念淳湖赤縣潭府清門何期過  
信冰言遂許締婚寒姓良由通家孔李曾附舉  
于鹿鳴况復舊睦潘楊更尋盟于鳳卜聞令淑  
女修文祿佇膺翟茀之榮愧比兒諧語錦衣尚  
戀鳩車之戲循禮文而內采筐篚薄將會時日  
之維良天人交贊宜爾室宜爾家顛顛永叶鸞

韓宅大禮啟

和俾而熾俾而臧奕奕長縣麟趾  
雲標玉樹久偕葛附之緣春麗瑤林漸近桃秦  
之候好述爰樂吉事有祥恭惟澹明親家閣下  
材挺世英道依年進經術屢優多士儼然還弘  
正端醇雅言必述先王卓爾步商周典則望聯  
珠而占合璧主天下之圖書友羣從而奉兩宮  
王斗中為孝弟合春華及秋實質有其文具儒  
檢與風流張而能弛蓋自雕龍禪世夙承家學

之淵源行將威鳳攬輝即應 廷儀之禎瑞不  
佞鼎向因親子僚婿申以媼媵兼展義于良朋  
同茲聲氣何敢謂兩大曰耦猶私愧十年稱兄  
問叔不癡老態已輸回策比兒未教少游尚竊  
佩囊惟念有室有家本男女及時之願快覩宜  
孫宜子實父母望歲之心況聞姆訓習媼蚤識  
無違敬戒女宗備著定徵有慶安貞薄遵舊典  
于儷皮敬修六禮預請嘉期于緹琯初動一陽  
于時義御南訛萬物敷華以任養至日星中東  
璧八能調景而履長佇晉福其方來俯懷燕喜  
冀謙光之下濟仰藉鴻慈

徐宅聘孫女回啟

乾元調玉燭恢台肇長養之期豐命錫瑤函嘉  
耦叶徵成之典會天人而訢合遭時物之清和  
正葵樞映日交敷景光猶麗在蘭茝從風共馥  
氣味原同獲締新歡實緣夙好恭惟重源太親  
家神明華胤特達鴻材龍作訥言躋九列允垂  
卿望鳳儀奕世翔千仞高覽德輝益廣譽于家

聲何慙肯構試策名于國胃快睹臨雍晚乃  
知微知彰悟須彌可納芥子衆言能聚能散向  
耆闍頓長蓮花惟茲慧業之累修遂俾象賢之  
挺出肆我從道親家績學本天之性清標率祖  
攸行中說稱北海偉長懷文抱質下榻重南州  
孺子操行匡時親灑墨池心畫垂八行之露夢  
吞丹篆詞華披五采之霞金百鍊而愈精曾經  
大冶壁三獻而始剖必遇明廷咸瞻奕奕于  
士鄉且咏振振之公姓生而負食牛之氣豈是

常兒童而即鬻豹之文定為快婿羨兩世友昆  
之集猶十朋以進百朋念一介父子之間真後  
蟹不如前蟹寧敢坐索聲價逃名反得虛名亦  
將動必周旋中禮恐嫌失禮而女孫之愛誠常  
過于男保傳之箴冀有淑其媛敬薄脩榛棗之  
贄庶方供櫻筍之厨進履襪而行與福俱蹈和  
玉趾贈琅玕而報非施稱俛媿瓊英念閎閎適  
相符願百代長聯芳媁佇門闌多喜氣占五世  
直並正卿仰藉星輝企承春育

代聘啟

伏以良緣初合門闈喜肇于雀屏嘉命遠臨筐  
篚禮隆乎雁幣榮踰鼎重感切冰競恭惟親家  
大人嶽降生申箕占賚說雄材焱迅茂誼霄齊  
鴻猷恢八面之奇稱良息馬鳳采擅一毛之譽  
襲慶傳貂室酉秘藏匪徒半豹庖丁神會直之  
全牛誠哉吾黨白眉允矣斯文具擘自維寒屋  
敢儷華楣下走分畊鑿之餘生樂長謠于駒谷  
仲氏脩繫鉛之故業奉清響于鸞車偶以斷金

茲焉倚玉清徵泛五絃之候實藍田種雙璧之  
期文定厥祥天作之合聞令子五經初授氣欲  
凌雲而弱息四德未嫻才非咏雪爰期夢鳥式  
荷委禽花灼灼燭煌煌擬乘龍于午夜月溶溶  
雲矯矯睹駕鵲于靈津懸知五世之昌永叶百  
年之雅敬承榛棗薄報瓊瑤仰企台光俯垂電  
鑒

又

媼聯世締貴因親以及親誼本宿緣繇同好而

為好光踰鼎鉉賜重益朋恭惟材振寰中格標  
絃外縹緗盈秩目涉羽陵之三千濶浙成文胸  
吞雲夢者八九細看月輪有意蚤攀桂闕之一  
枝行將春棘堪期定薦瓊林之片玉況復清襟  
爽爽鄙繩趨尺步為俗儒玄著超超能飲酒讀  
騷即名士既顯高門之積慶實稱昭代之儲英  
伏念某白襍微長青箱未學繆忝冠裳之會曾  
叅縞帶之交雖跡異雲泥仰援莫逮而味投蘭  
茝俯合非難藉宅相作蹇修永言卜鳳瞻門闌  
多喜氣遂許乘龍象謂秦晉相當盟原與國私  
幸朱陳伊邇契更通家如樂之諧式調和于琴  
瑟匪儀及物愧璀璨于玄黃維時蓮綻紅衣覆  
蓮結同根之固槐圍翠幄三槐兆奕葉之祥夔  
跂春融鶴翹星徹

代人壽某啟

六琯逢年闢戶天行黃道千金為壽臨觴日醉  
朱顏漢苑騰驩秦樓動色恭惟祥占寢月麗掩  
升霞謫籍燄摩之天寄館流波之汜棲燕徵歌

于玳瑁誇少婦之鬱金飛鳥引曲于筵簇配小  
姑以白石沈香亭北一枝芍藥露華濃玉鏡臺  
前並蒂海棠春睡足忽為雲而為雨偏其反而  
恍乍陰而乍陽遐不謂矣清譚霏玉傾南國之  
文人紅汗流珠昵西園之公子羅襪波凌于蓮  
步菱舟不怕搖錦衾浪瑩于桃心蘭漿從教蕩  
且意態橫生驪伯若風流殊自可兒茲者雙成  
鸞報三千宴開瓊圃百尺虹垂十二舞出霓裳  
繡幕牽絲沉測景方添弱線粧樓膩粉值吹葭

又見飛灰此蓋天非人不因行與事相會者也  
僕等才慙宋玉情難已于拂纓年謝潘安貌不  
聞于擲果何敢望同車之幸顧繆承三載之窺  
喜當設悅良辰願附賜錢雅集托佩囊而媽紫  
欲薦虎鞶携滿袖以熏香將分鳳沫伏願瑤池  
王母白雲遙望以在天貝闕姮娥丹藥長生而  
隱月酌神漿于北斗觥行中山竊靈實于東方  
籌增滄海

男 士都編閱

鹿裘石室集卷第十五終

鹿裘石室集卷第十五終

